

Anansi nanga Dede

So, now wi o ferteri wan pikin Anansi tori. Bika Anansi tori noiti abi kba. Wi o ferteri wan tori fu Anansi nanga Dede. Dede no ben e libi na ini a foto nanga libisma makandra. Ma san tyari Dede kon na doro? Na Anansi meki Dede kon na foto èn Dede no e gwe moro na busi.

Wan dei Anansi no ben abi noti fu du. A no ben abi nyanyan. Dan a taigi Ma Akuba taki: "Yere, mi o gwe go suku san mi sa feni. Poti den sani fu mi klari fu mi gwe."

Dan Ma Akuba teki wan katasu. A teki peiri nanga wan bo. A teki ukutiki. A poti someni sani gi Anansi na wan bondru fu a tyari gwe go suku san a sa feni.

Anansi gwe, a gwe dipi na ini a busi. Heri dei a waka na ini a busi. Anansi no feni noti. Ma di Anansi bo drai baka, a taki: "Hm, mi denki taki mi o drai baka." Dan di a opo en ai luku pikin moro fara na ini a busi, a si wan kampu. Leki fa den bigisma taki: "Pe smoko de, sma de."

Dan Anansi bigin waka fu go na a kampu. Di a waka kon wan pisi, a si wan sma sidon na mofo doro fu a kampu. Anansi taki: "Odi, mi ba."

Dan a man piki: "Odi, masra. San yu e du dya?"

A taki: "We, mi na Anansi. Heri dei mi waka suku wroko, ma mi no feni wroko. Dan tide mamanten mi taigi mi wefi taki meki a meki ala sani klari gi mi. Mi e go suku meti tyari kon na oso. Ma mi tata, fa yu si mi dyaso de, angri e kiri mi."

Dan a man taki: "Kon na insei, kon na insei, no! No tnapu na mofo a doro. Waka kon."

Anansi waka go na ini a kampu. Dan di a sidon ini a oso a taki: "Mi papa, angri e kiri mi."

Ba Dede taki: "I no sabi nanga suma yu e taki? Yu no sabi suma na mi?"

A taki: "Nono, papa."

A taki: "We, na mi na mat' Dede."

Dan Anansi taki: "Oo, a dya mat' Dede e libi."

A taki: "Iya." A taki: "We, dan yu waka go na ini a kukru, dan yu o si mi abi brabakoto meti na tapu a brantmiri. Dan yu e teki wan pisi sidon nyan. Dan mi e go gi yu pikin watra bika mi no abi noti moro."

Anansi teki wan bigi pisi bowtu. A nyan a meti, a nyan a meti. Dede e luku, a taki: "Ai, angri e kiri yu."

Anansi taki: "Iya." Anansi nyan, a nyan ala sani. Dan Dede gi en watra. Anansi dringi a watra.

Dan di Anansi dringi a watra, Anansi sidon e drai lontu e luku ini a kampu. A man aksi en taki: "San yu e luku so dan?"

A taki: "A wan sani mi wani begi, mi tata."

Dede taki: "San yu wani begi mi?"

Anansi taki: "Luku, heri dei mi waka. Den pikin fu mi na oso nanga mi wefi no nyan ete. I no kan gi mi wan pisi fu tyari go gi den?"

Dan a man taki: "Ai, dan i go teki wan pisi."

Anansi teki wan pisi bowtu di bigi dati a no man go ini a katasu. Ma afèn, a

syobusyobu a meti go. Dan Anansi taki odi.

Anansi gwe. Ai go na oso, ai froiti, ai singi. Di a doru na oso a taki: "Ma Akuba, Ma Akuba, mi doru baya, mi doru. Ai, Gado sari unu fu mi feni mi nyangron."

Ma Akuba aksi en taki: "Pe yu nyangron de?"

A taki: "Te na mindri busi. Wansi mi no abi wroko, mi no abi fu wroko moro, bika nyanyan de."

Ma Akuba taki: "Anansi, i mu luku bun te yu e gwe so fara."

Anansi taki: "I no abi fu frede gi mi. Nyanyan de. Mi e go nyan now."

So, dan so a tori de, a so a tori fu Anansi e waka. Wan mamanten Anansi opo. A no piki Ma Akuba srefsrefi pe ai go. Anansi teki wan blonsaka. A fringi en na en baka. A teki wan broko owru, dati na fu wai a busipasi pe ai psa. Dan a gwe. Anansi gwe, a gwe moi fara. A no e kon na oso. Ma Sa Akuba e prakseri: "Pe Anansi e tan so?" Anansi doru na a kampu pe Dede e libi. Dan Anansi luku ala sei. No wan sma no de na oso. A opo a kukru doru. A go, a furu a blonsaka nanga meti, dan a gwe. No wan sma no sabi, no wan sma no si en. A gwe.

Di mati Dede kon na oso, a go ini a kamra, a kenki en krosi. A go ini a kukru, dan a taki: "Hm, fa a gersi sma kon dya? Someni meti mi ben abi, someni meti. Someni meti mankeri." A tan so.

Wan tra dei na so Anansi e prei a sani. Anansi e go, ai go nomo. Nomo Dede tan wan dei na oso go seti dyam gi a man di e kon teki en meti. A kibri na ini a oso. Di a kibri na ini a oso, a yere Anansi e kon. Anansi luku. A si ala sani de leki den tra dei. A doru no sroto. A beni luku na ini a kamra, a no si noti. A go ini a kukru go na tapu a brantmiri. A lai a saka nanga meti, dan a fringi en na en baka.

Fa a wani gwe, nomo Dede ori en. A taki: "Yu boi, na yu e prei mi dyaso. Na yu e waka e fufuru ala den sani fu mi dyaso!"

Anansi no piki noti. Nomo Anansi dyompo abra a fensre. Anansi e lon! Anansi e lon, Anansi e lon. Dede na en baka, Anansi na fesi. Dede na en baka, Anansi na fesi. Den e lon psa a heri busi.

Di den doru dyaso pe frow Putter ben abi boiti (den e kari a boiti: Putterboiti) Anansi drai luku. A si Dede na en baka. Dan a bigin bari gi ala den sma drape na Purupangi: "Un tapu doru nanga fensre. Dede e kon! Tapu doru nanga fensre. Dede e kon!"

Na so Dede lon na en baka. Yu si, na so Dede kon na ini a foto. Dede no gwe moro na a busi. A dati meki ala sma e dede now.